

Straußjugend Reiwelskerch

HALLO! ICH HEISSE
WALTER UND BIN
TANKWART...

GEBEN SIE SICH KEINE
MÜHE, ICH STEH NICHT
AUF ARALVERKEHR...



© Uli Stein & köch Cartoon Edition GmbH, 30916 Isernhagen

2004

Kerwered 2004

Mer griëße eich all do unne ihr Leit,
un fräe uns, dass ihr kumm sin heit.
Zu de Kerweredner hot mer uns disjohr widder gewählt,
so welle wie mir, hann Reiwelskerch noch gefehlt.
Mit uns als Kerweredner sinner ganz gut bedient,
ja Reiwelskerch - du hosch uns vedient.
Un jetz - so mancher kanns nimmi here,
wolle mer die Keweredd an eich entbeere.
Die Kerweredd - ich sahns eich nur,
is Reiwelskerchs ältscht Kultur.
Ihr Inhalt - das will ich zitiere,
is vun vorne bis hinne reini Satire.
Wer net wes, was das is, der braucht net ze spucke,
der kann jo mol ins Lexikon gucke.

Um jetz mit de Kerweredd rischdisch loszelee,
müsse mer erscht unser Lampefeiber ablee.
Destewee nemme mer jetz unser Gläsje Wei,
un trinke noch änner uf de scheene Sunneschei.

Die Reiwelskeier Kerb soll lewe ...

...hoch

...hoch

...hoch

Ehrlich wert am längsten

Am 1. Mai wie jedes Johr,
dun die Junge die Bänk vun de Hall ufs Plätz je evor.
De Braun hot uns dert Ingang gewehrt,
hätte mer blos gewuscht was am Dach deno bassiert.
Als Kaffee un Kuche war dann erum,
simmer mit de Bänk an die Hall nuffer kumm.
Mer warn grad fertig mit de Bänk abzulade,
awer de Brucker lies als uf sich warte.
Um 2 Uhr wollter eigentlich kumme,
erscht um halb 3 herte mer ne an die Hall enuffer brumme.
Er is dann aus seinem Auto ausgestieh,
un hot uns erschtemo ogeschrie.
Er hot gemänt er wer net de Depp vun uns all,
sondern nur de Chef vun de Hall.
Net de Braune Gunder hat die Hall ufzeschließe,
sondern nur er derf uns dort begrieße.
Er hat uns als noch Vorträg gehall,
do simmer vor lache fascht uf de Borrem gefall.
10 min später hatte mer ne dann so weit,
er hat uns Ufgeschloß - es wurd jo a mo Zeit.
Mer hann die Bänk dann endlich eininnebrung,
do kam de Brucker schun widder ogesprung.
Er hot gemänt jeder holt vun de Hall un dut nimmi bringe,
un ich derf dann die Erklärung singe.
Fer das Ufschließe vum Gunder will de Brucker an uns Rache iewe,
un uns beim Karl anstelle als Glässerdiewe.
Er hat sich dann besunn,
un die Lieerei doch als dumm befunn.
Am Enn isser dann doch noch zur Besinnung kumm,
un hot endlich mo unser Worte venumm.
Er war dann uf ämo ganz brav un lieb,
un vun uns naderlich käner e Dieb.
Endschuldischt hotter sich dann ach,
fascht were mer ausgerutscht - uf seiner Schleimlach!
Dann hammer noch freundlich – Servus – gesa,
un sin widder nunner ufs Plätzje gefahr.

Werner Negschdjohr vesuch die Sach mo glei freundlicher ze mache,
dann gebts an de Kerb üwwer dich a nix ze lache!

Bundeswehr lässt Grüßen

Die Lämeäcker is in de Kerweredd e beliebti Stroß,
do is jo a immer was los.
Dismo gehts um de Herr Rabe,
den mer gesieh hat in letschter Zeit Löcher grabe.
Warum, hat am Anfang noch käner so genau gewuscht,
bis mer de Olli erblickt hot mit e paar Poschde, gehall zur Bruscht.
Awwer warum hatter das nur gemacht,
hatter vielleicht gebaut fer de Kennel e Dach?
Quatsch Janett, er hot sich doch nur an was gesteert,
deswee warem das den ganze Stress a wert.
De Olli war bes, weil die ganze Leit durch die Infahrt geloff sin,
was hatten die a ze suche dodrin?
De Eismann konnt sich dodebei jo nix denke,
awwer de Rabe konnts nimmi siehe,
un muscht das dann sofort beschränke.
Deswee hatter das ganz schlau gemacht,
un hot e paar Poschde hingestellt in voller Pracht.
E Kett hotter a gemacht dro,
un hotse links un rechts fescht ogezo.
An dere Kett hängt e gelwes Schildsche, feschtgemach mit Droht,
wo drufsteht, „Privatweg, Durchgang vebot“.
Es Problem is awwer, das die Poschde sin im Borrem drin,
un wie kumme die jetz die Infahrt eninn?
Wie die Poschde frisch gestann hann,
ware die Kinner mem Poschderaushole dran.
Do wurd 5min bevor die Eltre hämkame vun ne angeruf,
un gesa ihr Kinner mache de Weg frei fer enuff.
Jetzt dut sich de Olli jedesmo ausem Auto bewee,
um die Poschde selwert umzelee.

Mei lieber Olli, mach der doch net so viel Arwet mit dem Poschde,
nur e klä Schildsche dets doch a due un net so vielkoschde.

Peter uf Autoentzug

Die negschd Geschichte is am Schlachtfescht in Reiwelskerch bassiert,
un do hats a Wewersch Peter anegefiert.

No etwas längerer Zeit ufem Fescht,
isser mein Auto noch no Ginswiler gehescht.

Er war do a nimmi so ganz klar im Kopp,
der war schun arm dran der Dropp.

In Ginswiler warer dann Karte,
um mem weitertrinke konnter dann a net warte.

Wie er dann später owends widder no Reiwelskerch is kumm,
hotter dann erscht rescht alles gesieh schief un krumm.

Ortsingang Reiwelskerch hotter dann e anner Auto leicht gekisst,
un hot dann nom aussteie so manche Dääle am Auto vemisst.

Nodem es Ehepaar vum annere Auto a ausgestie is,
han se sich die ganz Lee mo ogeguckt,

un do hot de Peter schun kriet e bisje Schiss.

Der gute Mann hat erbarme mem Peter gehatt,
doch die Ehefra hat sich gestellt wie e Ratt.

Also hat die Fra kurzerhand die Griene bestellt,
un die kame 10 Minute später um die Eck geschnellt.

Nodem die Polizei de Peter hann venumm,
hotter 9 Monate de Führerschein abgenumm kriet,

um kummt jetzt nur noch mem Roller erum.

Du Peter, wenn de de Führerschein wirrer hasch,
dann fahr net betrunke, sunscht ziehe se der ne schnell widder aus de
Dasch!

Neverending Story

Un nun folgt e Bericht,
iwwer e niemals ennendie Geschicht!
In Reiwelskerch gebts so e paar Ecke,
die unser scheenes Dorf beflecke!
Zum Beischbiel steht in de Kellebohn so e aldes Gemeier,
dass so langsam werd ganz schee deier!
Seit em Enn vun de 90er Johr,
werd an der Renovierung ganz schee Geld velohr!
Zum Johr 2000 un xxx wollt mer die Bursch begehbar mache,
ach - daß ich net ofang ze Lache!
So langsam mist mer die Bursch mo fertisch stelle,
weil es werd lächerlich - Gelle !?!?
Mer vestehn jo das so e Projekt Zeit in Ospruch nemme dut,
awwer irgendwann isses doch a mol gut!

Zwische Hauptstroß un Kellebohn gebts noch so e Gebiet,
wo anscheinend a käner was uf de Abbel kriet!
Im Parrgarde sollt emo e Spielplatz unn e Grilleck ane,
awwer das End jo a nur in Pleite, Pech un Panne!
Okay die Grillhütt sinn se jo grad am fertigkriehe,
awwer vum Spielplatz is noch nix zu siehe!
Immerhie geblaschdert isses jo schunn,
unn zwä Bänk hann a ihr Platz gefunn!
Ach ich kennt noch Stunnelang so weiter mache,
awwer ich kann nimmi vor Lache!

Zum Schluß noch e ernscht gemähnter Rod:
Bringe die Sach mo so langsam zum Ende,
sunsch simmer am Schluß allega in Rende!

Martinsumzuch á la Sam

Us Lothar hot Probleme mitem Autofähre,
un do dun sich die Ortslampe nur denke „Oh Gott bewahre“.
De Sam is vun de Becherbacher Kerb mit gut Gas no Ginswiller geschwat,
un hot sei vierer Golf dert voll gee e Stroßeladern gejaat.
E Bewohner vun dem Ort hot die Sach a noch gesie,
un hot gedenkt do jaa ich glei die Polizei un die Feierwehr hie!
De Lothar hot sich uf ämo gewunnert,
warum der Griene als fort an die Scheiwe dunnert.
Er hot sich aus dere ganz Sach naderlich kä dicker Kopp gemacht,
un hot dann emo e bisje Zeit ohne Führerschein vebracht.
De vierer Golf wurd dann aus de Gedanke gestrich,
un wurd durch e Unnerschrift miteme Fünfer beglich.
De fünfer Golf wurd dann a glei bestellt,
geliwwert un a noch ogemeld.

Lothar do bische awwer nommo gut devun kumm,
awwer fahr net nochemo e Latern in Ginswiller um.
Du wäsch jo das de sunsch wirrer wersch vun de Polizei un Feierwehr gefunn,
un wer wäs wie das es negschde mol werd vun dene venumm.

Un die Moral von der Geschicht
„Wenn du fährst, dann trinke nicht!“

Typisch Norbert

Mer hann ach widder änner vun unsere Stammgäscht an de Stang,
un des is die Lämeäckerer Familie Lang.
De klä Norbert hot anscheinend bezug zu Waffe,
un das gebt uns schun ganz schee zu Schaffe.

Am 1.Mai zu später Stunde,
ware mer hexe un hann gemacht unser Runde.
Wach ware zu dere Zeit nur noch die Familie Lang,
uns wars dodebei irgendwie ganz bang.
De Baumann wollt grad bei ne hexe gehe,
uf ämo dut de Norbert ufem Balkon stehe.
De Norbert hot do gestann un mit erhobenem Finger gescholl,
ei sei Kopp war do vielleicht rot ogeschwoll.
Uf Ämo kreischter zum Baumann „Ich du dich mitem Luftgewähr abschieße“,
un dut uns dodemit die ganz Laune am Hexe vemieße.
Mer hann dann gedenkt, schieß du nur,
du glabsch doch net, das die Polizei is in Kur!

E paar Da später ...

Mer hot de Norbert dann ufem Plätzje ogetroff,
woer unser Grillholz vum 1.Mai in de Kofferraum hot geworf.

Ich würd sae mer beende die Geschicht do,
sunscht schießt uns de Norbert noch o.

Mei lieber Norbert, loss doch die viele Worte sei,
sunscht bische Negschdjohr widder in de Kerweredd debei.

Vorstellung in der Küche

Ehr Leit beim negschte stick müsse mer eich mo was ernschdes fro,
ihr denke doch a, dass Kiche sinn zum Koche do?

Owens gehen so manche Bewohner mem Hund spaziere,
un siehn dann Leit die sich verhalle wie Diere.

In de Leimeäcker gebts viel Zeich zu siehe,
awwer käner denkt, dass mer dort kriet Live - Verkehr zu siehe.

Zwische Debus un Brandte muss mer gehe,
un dort kann mer was erspäe.

Bühlersch ihr Haus steht bekanntlich dort,
un wie schun erwähnt is die Kich e beehrter Ort.

Mer kann vun de Stroß aus e guter Blick ins Kichefenschter krie,
un do sieht mer de Claus uns Elke nur sich ufem Disch vebie.

Der Füßgänger konnts net fasse, un nur noch mäne,
ich glabs net, die mache do inn e paar Kläne.

Der Mann saht a noch, ich hät jo net gedenkt das ich in sonem Alter
nommo so e Vorstellung krie,

un mir glawe er hat a noch gesah, ich hocke mich mo hie.

Die Zwä warn so miteinander bei de Sache,
dasse net dro gedenkt hann de Rollade erunner ze mache.

Mer misse jetzt noch äns los werre,

wenn das widder vokummt,

dun entwirrer e anner Zimmer oder de Rollade verwenne.

Un wenn net, dann lossen wenischdens net es Licht in de Kich brenne.

Schluss

Ehr liewe Leit un Kerwegeschd,
das war die Redd zu unserm Feschd!
Mer hoffe, die Betroffene sin net ganz so bes üwwer unser Geschichte,
negschdes Johr du mer üwwer jemand anderes berichde.
Dann derfe ihr mo üwwer die annere lache,
was die üwwers ganze Johr fer dumme Sache mache.

Ihr Leit, mer here jetz uff soviel ferz ze vezehle,
mer dun jetz all mitenanner unser Kehle eele.

Falls ner an dem Meischderwerk hann gefalle gefunn,
pro Stick wern 2€ genumm.
Ihr brauche nur an die Trepp laafe,
un eich die Kerweredd kaafe.

Ganz am Schluß wie jedes Johr,
bitte mer jetz de Beuemäschder vor.
Desohr hammer a noch Premiere,
un hun es erschde mo mem Bettche die Ehre.
Also los dich net lang bitte,
un kumm zu uns uf die Biehn mit schnelle Schritte.

So, jetz dun mer nommo all unser Glässer erhewe un kreische:

„DIE REIWELSKEIER KERB SOLL LEWE ...“